

# Sharon Rose: Huesped di Honor na Arubahuis

*E siguiente fotonan ta duna un bista con bon nos cantante Sharon Rose su famia y amigonan a pasa durante su reciente bishita na Arubahuis na Den Haag.*



STA. CRUZ-- Ya for di tempran na nan yegada Sharon Rose y su amigonan a haya e recorrido tradicional di Arubahuis for di e simpatica Leonie. Despues e recepcion na honor di nos primerisima Sharon Rose a inicia y den ausencia di Minister cu tabata sufri un quebrante di salud, sr. Kenky Oduber a asumi e encargo di ricibi Sharon Rose cu un elocuente discurso acompaña pa un bunita regalo y flornan exquisito. Sharon na su turno no tabata tin palabranan suficiente pa gradici tur cu di un of otro forma a contribui pa su prome bishita na Hulanda cu tabata uno berdaderamente inolvidabel. Pesey Sharon Rose a gradici Addonsito Croes, Maurits Malmberg y na Brenda Nogera pa e honor na Aruvision Festival, Dennis Geerman di Vision Magazine como tambe e ricibimento di braza habri cu el'a haya na Arubahuis unda cu el'a sinti su mes totalmente na cas. Na henter e Staff y Personal di Arubahuis principalmente sr. Kenky Oduber, sr. Sidney Kock, sra. Ivonne Quant. Tambe sr. Gregory Larmonie y su crew pa e excelente buffet cu no tabata tin pa igual'e den su creatividad y sabor. Un danki di curazon tambe na su coleganan cantante y

musiconan entre otro Lidwina Booi cu a bin comparti a honor aki cune y a canta y balia sin fin. Sharon Rose a deleita e publico presente cu algun cancion acompaña pa Lidwina Booi cu su guitarra pero tambe cantando su exitonan di momento manera entre otro "Nos Cultura", un composicion di Gos Oduber, cu a yega e puesto number 1 riba Top 30 na Top FM 95 e aña aki. Naturalmente Sharon no por a keda sin gradici su primanan Sylvia, Rossana y Gina Evers cu si no ta pa nan, Sharon no tin su documentario awe como recuerdo. Principalmente tambe Sharon su amor incondicional y gratitud inmenso na su yiuonan Elton y Thirza y nietonan y pa Ashley su hospitalidad, esaki a culmina su alegria na Hulanda. Y ora tur invitado a kere cu e fiesta ta den caba, sr. Kenky Oduber a subi tras di microfono un vez mas pa institui un condecoracion nobo cu yama "Leeuw van Oranje van Arubahuis" cual el'a entrega na Sharon Rose como e prome pa ricibi e honor aki. Tur presente a keda satisfecho y di acuerdo cu e honor adicional aki cual a ser duna na nos primerisima Sharon Rose. Naturalmente e fiesta a sigui cu mas euforia. E fotonan ta papia pa nan mes.

